

1 Timoteo

E apòstel Pablo tabatin hopi kompañero i ayudante un tempu òf otro durante su biahnan mishonero: Barnabas, Silas, Juan Marko, Lukas, Tito, Sópater, Aristarko, Segundo, Gayo, Tikiko, i Trófimo. Ma ningun tabata mas kerí i spesial pa Pablo durante su ministerio i asta ten a fin di su bida ku Timoteo. Timoteo tabata Pablo su amigu mas intimo.

I. BIDA DI TIMOTEO

Timoteo ta un di e kristiannan mas gustabel i mas deboto di henter Tèstament Nobo. Tabata un onor pa Timoteo ku e mishonero prinsipal di e era ei a skoh'é pa ta su asistente. Ma Pablo tambe a rekonosé e gran balor di Timoteo, yamando e “*hòmber di Dios*” (6:11).

A. TIMOTEO SU MAYORNAN

Segun Echunan 16:1, Timoteo su tata tabata un griegu. Beibel no ta duna su nòmber. Kisas esei ta indiká ku su tata no tabata un kreyente. Su mama, Eunise (2 Timoteo 1:5), tabata un hudiu ku a konfia Hesus pa salbashon

E nòmber “Timoteo” ta nifiká “onrá pa Dios”, “onrando Dios”, “esun ku ta onra Dios”, òf “di gran balor pa Dios”. Talbes esaki tabata un nòmber ku su mama a dun'é.

Timoteo su mama, Eunise, huntu ku su wela, Loida, a siñ'é Palabra di Dios segun 2 Timoteo 1:5 i 3:15. Esaki ta indiká ku welonan i welanan por tin un impakto grandi den bida di nan nietunan i nietanan si nan ta pone esaki komo prioridat.

B. TIMOTEO SU SIUDADANIA

Pablo a enkontrá Timoteo na e stat di Listra (Echunan 16:1-2), un stat romano den e provinsia di Galasia. Pues, ta rasonabel pa pensa ku e tabata un habitante di Listra

C. TIMOTEO SU KOMBERTIMENTU

Ta parse ku Timoteo a kombertí serka Pablo ora el a bishitá Listra durante su promé biaha mishonero. E echu ku Pablo ku frekuensia ta referí na Timoteo komo su yu (1 Korintionan 4:17; 1 Timoteo 1:2,18; 2 Timoteo 1:2), por indiká ku Timoteo ta su yu spiritual i ku e tin un relashon spiritual será ku n'é.

Ta bon pa nos pousa i pensa un ratu tokante Pablo su promé biaha mishonero (Echunan 14:1-25). Na Ikonio (14:1-6), Dios a obra dor di Pablo i Barnabas. Nan a hasi milagernan i un “*gran multitud a kere*”. Ora nan a tende di plan di e multitud pa ataká nan, nan a hui pa Listra.

Na Listra (14:7-20), nan a kura un hòmbèr lam i e multitutnan pagano a prepará pa adorá Pablo i Barnabas, keriendo ku nan ta diosnan. E apòstelnan a pone un paro na esei. Anto hudiunan a bin di Antiokia i Ikonio i a konvensé e multitut pa piedra Pablo, te ku nan tabata konvensé ku e tabata morto. Ma Dios a hasi un milager. Miéntras e kristiannan tabata para wak, Pablo a lamta. Nos no sa si Dios a lamt'e for di morto òf si Dios a kur'è.

Kisas Timoteo tabata presente ora Pablo i Barnabas kura e hòmbèr lam i a tende nan roga e multitut pa no adorá nan. Tambe ta pusíbel ku Timoteo a mira e multitut piedra Pablo. Kisas Timoteo tabata un di esnan ku tabata para wak ora Pablo milagrosamente a lamta despues di a wòrdu piedrá.

Sin duda esaki lo a hasi un impakto riba Timoteo! E eventonan aki lo a konfirmá den Timoteo su mente ku Pablo ta un hòmbèr di Dios! Sin duda Timoteo lo a anhelá pa ta huntu ku su tata spiritual i siña for di dje!

D. TIMOTEO SU PERSONA

Skritura ta duna nos diferente informashon tokante Timoteo:

1. Timoteo tabata mas hóben ku Pablo (1 Timoteo 4:12). Kisas Timoteo tabatin 35 aña di edat. Algun ta pensa Pablo tabata dòbel edat di Timoteo. Tòg tabatin un amistad inkreíbel entre nan. Homer Kent a skirbi den *The Pastoral Epistles* (página 19):

“E echu ku un hòmbèr mas grandi lo stima, instruí i konfia un hóben sin interes propio i sigui demonstrá kompañerismo tan será pa aproksimadamente 20 aña siguramente ta admirabel. Ku un hóben lo reakshoná ku respèt similar, konfiansa, i admirashon di kurason sin yalusí, impasiensia, òf amargura ta igualmente di aploudí. E relashon di e dos hòmbèrnan aki ta un demonstrashon remarkabel di e mihó birtutnan kristian.”

2. Timoteo su karakter. Timoteo sin duda tabata mas tímido ku Pablo (2 Timoteo 1:7; 1 Korintionan 16:10-11; 1 Timoteo 4:12). E tabata un hòmbèr deboto na Dios (1 Timoteo 6:11), responsabel (Filipensenan 2:19-23), fiel i leal (1 Korintionan 4:17), suave i caloroso (1 Korintionan 4:17; Filipensenan 2:20-21). Un outor a skirbi: “Timoteo tabata un di e kompensashonnan maraviyoso ku Pablo a gosa for di e trato kruel ku el a risibí na Listra.”

3. Timoteo tabatin lucha ku su salú. Beibel no ta indiká presisamente kiko su problema fisiko tabata, ma 1 Timoteo 5:23 ta divulgá ku sikiera un problema tabata su stoma.

E. TIMOTEO SU MINISTERIO

1. Durante su promé biaha mishonero, Barnabas a kompañá Pablo huntu ku Juan Marko. Ma Juan Marko a laga nan na kaya i a bandoná nan durante e biaha. Pa su di dos biaha mishonero, Pablo a skohe Silas pa remplasá Barnabas (Echunan 15:40). Nan a kuminsá e biaha. Ora nan a yega na Listra, un stat ku Pablo a bishitá durante e promé biaha mishonero, nan a invitá Timoteo pa biaha huntu ku nan (Echunan 16:1-3), remplasando Juan Marko. Sin duda Timoteo lo a konsiderá esaki un onor sumamente grandi.

Ripará e kalidat di Timoteo su bida den Echunan 16:2, “*i e rumannan ku tabata na Listra i Ikonio tabata duna bon testimonio di djé*”. Timoteo tabatin un bon reputashon. Mas ku un hende a duna bon testimonio di Timoteo. Asta hende di otro stat tambe a papia bon di Timoteo. Un bon indikashon di un persona su reputashon ta ku hopi hende ta duna bon testimonio di su persona.

2. Timoteo a kompañá Pablo den su di dos i di tres biaha mishonero (Echunan 16-18; 1 Timoteo 4:14; 2 Timoteo 1:6). Kasi sigur esaki a enserá hasiendo tareanan chikitu pa Pablo i Silas—nada spektatular. Timoteo lo sirbi Pablo manera Eliseo a sirbi Elias i Josué a sirbi Moises. (Segun 2 Reinan 3:11, Eliseo tabata basha awa riba mannan di Elias.)

Ma Timoteo tabata fiel pa hasi e trabou umilde, i na e tempu apropiá Dios a hals' é. Ku frekuensia hende ke sirbi Dios na maneranan visto, grandi, spektakular, hañando puesto. Ma nan no ta despuesto pa ta sirbi promé! Hesus a bisa, “*Esun ku ta fiel den un kos masha chikitu, ta fiel tambe den hopi...*” (Lukas 16:10). Dios ta mira ora nos ta sirbi ku pasenshi den kosnan chikitu i E lo halsa nos na Su tempu.

Ma komo ku Timoteo a sirbi e apòstel tan fiel, el a haña oportunitad pa opsevá djaserka i siña for di un apòstel eksperensia kon pa hasi ministerio! Tambe el a haña oportunitad pa mira Dios Su obra ku su mes wowo! Timoteo a partisipá den establesementu di iglesianan na Filipos, Tesalónika, i Berea (Echunan 16:4-17:15). Pablo tambe a pidi Timoteo pa keda na Berea i Tesalónika huntu ku Silas ora Pablo a bai Atenas (Echunan 17:15-18:4; 1 Tesalonisensenan 3:1-2). Nan a topa Pablo bèk na Korintio (Echunan 18:5) pa yuda funda e iglesia ei.

Timoteo tabata huntu ku Pablo na Efeso. Pablo a keda na Efeso pa tres aña i iglesia a krese rápidamente. Timoteo lo a bin konosé e rumannan i ministerio na Efeso hopi bon. For di ei Pablo a manda Timoteo i Erasto pa bolbe bishitá Masedonia i Akaya pa prepará pa su próksimo bishita (Echunan 19:22; 1 Korintionan 4:17; 16:10). Timoteo a topa Pablo bèk na Efeso anto a biaha huntu pa Masedonia i Akaya,

Pablo a skirbi 1 Korintionan durante Timoteo su ousensia, ma a skirbi 2 Korintionan despues ku Timoteo a regresá (2 Korintionan 1:1). Despues Timoteo a biaha huntu ku Pablo na Masedonia, Akaya i Asia Menor i asta te Herusalèm (Echunan 20:1-5). No ta konosí si Timoteo a kompañá Pablo na Herusalèm unda Pablo a ser arestá i durante su dos aña di enkarselashon (Echunan 21-28). Ma ta konosí ku Timoteo tabata huntu ku Pablo na Roma durante su enkarselashon (Filipensenan 1:1; 2:19-23; Kolosensenan 1:1; Filemon 1:1).

3. Despues ku Pablo a haña su libertat for di prizon, e apòstel a duna Timoteo enkargo di iglesia di Efeso (1 Timoteo 1:3). Pablo a skirbi un karta p' é durante e tempu aki. E karta ta konosí komo 1 Timoteo. E iglesia na Efeso lo tabata eksistí 5-8 aña so ora Pablo a skirbi 1 Timoteo.

4. Ora Pablo a wòrdu arestá pa di dos biaha, el a pidi Timoteo pa bin serka dje na Roma (2 Timoteo 4:9,21). Nos no sa si Timoteo a bai òf si el a logra yega Roma promé ku Pablo a wòrdu ehekutá. Ta pusibel ku el a bai Roma i e tambe a wòrdu enkarselá (Hebreonan 13:23) i despues a haña su libertat.

5. Segun tradishon, Timoteo a muri komo martir durante reinado di emperador Domitian (69-96 A.D.) òf Nerva (96-98 A.D.)

II. OUTOR, OKASHON I FECHA DI E BUKI

Debí ku 1 & 2 Timoteo i Tito ta tan ligá ku otro, nos a kubri informashon tokante e outor, okashon i fecha di e buki den e kapítulo anterior ku a introdusí e Kartanan Pastoral.

III. PROPOSITO DI E BUKI

Kiko tabata algun di Pablo su propositonan pa skirbi e karta akin a Timoteo?

A. PABLO A SKIRBI PA PROVEÉ GUIANSA PA TIMOTEO

Pablo a skirbi e karta aki pa duna Timoteo instrukshon pa loke e mester a hasi komo Pablo su representante na Efeso: organisá, atministrá, i supervisá e iglesia di Efeso (3:14-15). Kapítulonon 2,3 i 5 ta reflehá e meta aki mas tantu. Pablo a duna instrukshon tokante diferente tópiko den e kapítulonon aki:

- 2:1-8 - orashon den e sirbishi
- 2:9-15 - responsabilidatnan di damanan den iglesia
- 3:1-13 - kalifikashonnan di ansianonan i diakononan
- 5:1-16 - kuido finansiero di biudanan den iglesia
- 5:17-25 - ordenashon, sosten i disiplina di ansianonan

B. PABLO A SKIRBI PA ENKURASHÁ TIMOTEO

Pablo a enkurashá Timoteo pa ta un minister fiel. El a enkurash'é pa sòru ku su bida privá i públiko ta ehemplar. Timoteo tabatin mester di enkurashamentu pa vários motibu.

Un motibu ku Timoteo tabatin mester di enkurashamentu ta pasobra e tabatin un karakter mas tímido ku Pablo (2 Timoteo 1:7). Ta parse ku kompará ku Pablo, e tabata mas trankil, suave, kouteloso, ketu, no ke kousa problema. Pablo a skirbié manera un tata ta skirbi su yu pa enkurash'é pa hasi loke e mester hasi.

Ku frekuensia den 1 Timoteo, Pablo ta kòrda Timoteo di su responsabilidat pa ku su yamada (1:18; 4:6,12,16; 5:21; 6:11,20), kasi komo sifuera e ta purba enkurash'é pa no pone su yamada un banda apesar ku e tarea ta difisil i grandi.

Timoteo tabata mas hóben (4:12; 2 Timoteo 2:22). Sigur Timoteo tabata hóben kompará ku Pablo i ansianonan den iglesia. Esaki lo a poné hala atras pa ku kreyentenan di edat mas atvansáden e kongregashon na Efeso.

Foko di kapitulonon 4 i 6 ta espesialmente riba enkurashamentu pa Timoteo.

C. PABLO A SKIRBI PA MOTIVÁ TIMOTEO

Pablo a avisá Timoteo pa kombatí doktrina falsu i pa presentá doktrina sano. Pablo a avisá e ansianonan di Efeso ku siñansa falsu ta kla pa infiltra iglesia (Echunan 20:29-30). E doktrina falsu lo bin tantu dor di hende pafó di e kongregashonnan kristian i tambe for di hende ku ta asistí na sirbishinan di iglesia. Segun 1 Timoteo 1:3-4, esei a kuminsá sosodé kaba. P'esei, ripitidamente den e karta aki, Pablo a keda avisá di siñansa falsu i a motivá Timoteo pa siña hende e bèrdad, doktrina sano. Nota diferente manera ku esaki ta enfatisá den Pablo su karta na Timoteo:

- 1:3-11 ta kombatí doktrina falsu i ta boga pa doktrina korekto.
1:3-4 - *“mi a konsehábo...pa bo instruí sierto hòmbernan pa nan no siña hende doktrina straño, ni paga atenshon na fábulanan i genealogianan sin fin...”*
1:5 - *“Ma e propósito di nos instrukshon ta amor for di un kurason puru i un bon konsenshi i un fe sinsero.”*
- Tekstonan ku ta referí na “e fe” (“e” t’ei na griegu, asta si e palabra “e” no ta presente na Papiamentu). “E fe” ta referí na e siñansa kristian:
1:19 - *“algun hende a rechasá i asina a noufragá enkuanto nan fe.”*
3:9 - *“...kendenan ta warda e misterio di fe ku un konsenshi limpi.”*
4:1 - *“...den e último tempunan algun lo kai for di fe...”*
4:6 - *“...un bon sirbidó di Cristo Jesus, alimentá ku e palabranan di e fe...”*
5:8 - *“...si un hende no proveé pa su mes hendenan, i spesialmente pa esnan di su kas, el a nenga e fe.”*
6:10 - *“...algun hende, dor di deseá esaki (plaka), a desviá for di e fe...”*
6:12 - *“Lucha e bon lucha di fe...”*
6:21 - *“...algun hende a profesá i asina a desviá for di e fe.”*
- Tekstonan ku ta referí na doktrina òf siñansa bíbliko

1:9-10 - “...lei no ta trahá pa hende hustu, ma pa esnan ku ta sin lei...i kualkier otro kos ku ta kontrario na **siñansa sano**...”

4:6 - “...alimentá ku e palabranan di e fe i di e **doktrina sano** ku bo a sigui.”

4:13 - “...okupá bo mes ku lesamentu di Skritura, eksortashon i **siñamentu**.”

4:16 - “Paga bon tino na bo mes i na bo **siñansa**...”

6:1 - “...pa e nòmber di Dios i e **doktrina** no wòrdu blasfemá”.

- Tekstonan ku ta mensioná siñadonan

3:2 - “Un ansiano anto mester ta...un hende...**ku kapasidat pa siña hende**”

5:17 - “Laga e ansianonan ku ta goberná bon wòrdu konsiderá digno di dòbel onor, *spesialmente esnan ku ta traha duru den predikamentu i **siñamentu***.”

- Ta interesante pa nota Pablo su urgensia pa ku doktrina falsu dor di kompará Pablo su promé i di dos karta na Timoteo:

Den 1 Timoteo Pablo ta papia tokante “algun”

1:6 - “**algun hende**, dor di desviá di e kosnan aki...”

1:19 - “**algun hende** a rechasá (e fe) i asina a noufragá enkuanto nan fe”

5:15 - “**algun** a bira bai, pa sigui tras di Satanás”

6:10 - “**algun hende**...a desvia for di e fe”

6:21 - “**algun hende**...a desvia di e fe”

Den 2 Timoteo, e “algun” a bira “tur”

1:15 - “**tur** esnan ku ta na Asia a bira bai for di mi”

4:16 - “**tur** a bandonámi”

Di Pablo su perspektiva, tabata urgente pa protehá doktrina sano.

- Ta parse ku Pablo su spiertamentunan na iglesia di Efeso dor di Timoteo tabatin un afekto positivo. Segun Revelashon 2:1-2, Hesus a aploudí iglesia di Efeso pa nan trato ku doktrina falsu: “Skirbi na e angel di iglesia di Efeso... ‘Mi konosé bo obranan i bo trabou duru i pèrseveransia, i ku bo no por soportá hende malbado, i bo ta pone na prueba esnan ku ta yama nan mes apòstel, ma ku no ta, i bo a haña sa ku nan ta falsu...bo ta odia e obranan di e nikolaitanan, kualnan Ami tambe ta odio’.”

Kòrdando esaki, nor por bisa ku e lema di e buki ta lo siguiente: Pablo a skirbi Timoteo pa e ta un fiel sirbidó di Dios i pa e sòru pa e iglesia di Efeso, espesialmente su organisashon i atministracion.

IV. STRUKTURA DI E BUKI

Un pusíbel skema di e buki ta lo siguiente:

Kumindamentu - 1:1-2

I. SPIERTAMENTU PA TIMOTEO - 1:3-20

A. Reprendementu pa ku Siñadornan Falsu - 1:3-11

1. Instrukshon: Pone Paro na Siñansa Falsu - 1:3-7

2. Splikashon: Proposito di Lei - 1:8-11

B. Enkurashamentu pa Sigui Ehempel di Pablo - 1:12-20

II. ORGANISASHON DI IGLESIA LOKAL - 2:1-3:16

A. E Prioridat di Orashon - 2:1-8

B. E Lugá di Hende Muhé - 2:9-15

C. E Kalifikashonnan pa Ansianonan - 3:1-7

D. E Kalifikashonnan pa Diakononan - 3:8-13

E. E Proposito di Iglesia - 3:14-16

III. KONDUKTA DI TIMOTEO - 4:1-6:21

A. Pa ku Apostasia - 4:1-5

B. Pa ku Su Mes - 4:6-16

C. Pa ku Biudanan - 5:1-16

D. Pa ku Ansianonan - 5:17-25

E. Pa ku Katibunan - 6:1-2

F. Pa ku Siñadonan Golos - 6:3-10

G. Pa ku Su Ministerio - 6:11-16

H. Pa ku e Rikunan - 6:17-19

I. Pa ku Konosementu Falsu - 6:20-21

Un otro skema ta duna un otro perspectiva:

Kumindamentu - 1:1-2

I. INSTRUKSHON TOKANTE DOKTRINA – 1:3-20

II. INSTRUKSHON TOKANTE IGLESIA – 2:1-3:16

III. INSTRUKSHON TOKANTE SIÑADÓNAN FALSU – 4:1-16

IV. INSTRUKSHON TOKANTE RESPONSABILIDAT PASTORAL – 5:1-6:2

V. INSTRUKSHON TOKANTE MOTIVASHON PASTORAL – 6:3-21

VII. OPSERVASHONNAN DI E BUKI

Nota diferente punto enkuanto di Pablo su promé karta pa Timoteo:

A. KALIFIKASHONNAN PA LIDERATO

Den kapítulo 3, Pablo a duna un lista di kalifikashonnan pa ansianonan i diakononan. Loke ta interesante ta ku ningun di e kalidatnan ta mensioná eksito finansiero òf puesto haltu den komunidad, negoshi òf gobièrno. Karakter ta e kos prinsipal. Liderato spiritual bèrdadero ta resultá for di un persona su bida pa ku Dios—no lògronan òf eksito den e mundu aki. Ta importante pa nos iglesianan nunca perdè bista di esaki.

B. HESU-KRISTU TA DESTAKÁ DEN E BUKI

Tin tantu bon instruksion den 1 Timoteo, ku nos por keda sin mira ku Kristu ta destaká den e buki. Den 1:12,14, Kristu ta e Fuente den forsa, fe i amor spiritual. El a bin den mundu pa salba pekadónan (1:15). Segun 2:5, Kristu ta e úniko Mediador entre Dios i hende: “*Pasobra ta ún Dios so tin, i ún Mediador tambe entre Dios i hende, e hende Cristo Jesus*”. I segun 2:6, Kristu a “*duna Su mes komo e preis di reskate pa tur hende*.” Talbes 3:16 tabata un himno antiguo. E himno aki ta yen di doktrina tokante Kristu Hesus: “*Dios a wòrdu manifestá den karni, a wòrdu hustifiká den e Spiritu, a wòrdu mirá dor di angelnan, a wòrdu prediká entre e paganonan, mundu a kere den djE, i El a wòrdu risibí ariba den gloria*.” Pablo no ta laga duda ku Hesus ta Dios. E ta “*Salvador di tur hende, spesialmente di kreyentenan*” segun 4:10. I tambe 6:15-16 ta hopi kla tokante e persona di Hesus: “*Señor Jesu-Cristo, kual E lo manifestá na su debido tempu—Esun, Kende ta e bendishoná i e úniko Soberano, e Rei di reinan, i Señor di señornan; Kende so tin inmortalidat i ta biba den e lus inaksesibel; Kende ningun hende no a*

mira nip or mira.” Klaramente Pablo ta halsa e nòmber di Hesu-Kristu den e buki aki. Nos por nota tambe ku Hesus Su segunda binida ta menshoná aki.

C. E BUKI TA PRAKTIKO, NO DOKTRINAL

E karta aki no ta desaroyá un òf otro doktrina. Pablo a hasi esei den hopi di su otro kartanan kaba. E eskritor ta interesá pa duna instrukshon riba un nivel korporal. Pues, e kartanan pastoral ta kontené informashon pa iglesia kolektivo i pa su lidernan.

Maske e karta su foko no ta doktrinal, Pablo ta enfatisá ku Timoteo mester kombatí doktrina falsu i pa siña e bèrdat!

Literatura Konsultá

- Alexander, David & Patricia ed. *Eerdmans' Handbook to the Bible* (Grand Rapids, Michigan: William B. Eerdmans Publishing Company, 1973), p. 618-621.
- Baxter, J. Sidlow, *Explore the Book* (Grand Rapids: Zondervan Publishing House, 1966), p. 229-242.
- Demaray, Donald E. *Bible Study Sourcebook* (Los Angeles: Cowman Publishing Company, 1964), p. 170-171.
- Earle, Ralph. Gaebelin, Frank. E. ed. *The Expositor's Bible Commentary*: (Grand Rapids: Zondervan Publishing House, 1990), vol. 11, p. 341-347.
- Gromacki, Robert G., *New Testament Survey* (Grand Rapids: Baker Book House, 1974), p. 293-296.
- Gundry, Robert H. *A Survey of the New Testament* (Grand Rapids, Michigan: Zondervan Publishing House), p. 307-310.

- Guthrie, Donald. Tenney, Merrill C. gen. ed. *The Zondervan Pictorial Encyclopedia of the Bible* (Grand Rapids, MI: Zondervan, 1976), vol. 4, p. 611-618.
- Jensen, Irving L., *Jensen's Survey of the New Testament* (Chicago: Moody Press, 1981), p. 373-377.
- MacArthur, John. *MacArthur's Quick Reference Guide to the Bible* (Nashville, TN: W Publishing Group, 2001), p. 268-274.
- Mears, Henrietta C., *What the Bible is All About* (Minneapolis: World Wide Publications, 1966), p. 553-555.
- Poehnell, Gray. *New Testament Survey* notulonon (Prairie Bible Institute: Three Hills, Alberta, Canada, 1983).
- Tenney, Merrill C., *New Testament Survey* (Grand Rapids: Wm. B. Eerdmans Publishing Co., 1961), p. 333-336.
- Wilkinson, Bruce & Boa, Kenneth. *Talk Thru the Bible* (Nashville, TN: Thomas Nelson Publisher, 2002), p. 426-431.